

CUMÜN DA SCUOL



Ledscha davart las remuneraziuns per autoritats e cumischiuns

Ledscha da remuneraziuns

REGISTER

Artichel

I. Disposiziuns generalas

Oget	1
Princip	2
Bunificaziun da las spaisas	3
Execuziun	4

II. Remuneraziuns

Capo cumünal	5
Suprastanza cumünala	6
Cussagl da scoula	7
Cumischiun sindicatoria	8
Ulteriuras cumischiuns	9
Remuneraziun per protocols	10
Ulteriuras funcziuns	11

III. Disposiziuns finalas

Aboliziun dal dret actual	12
Entrada in vigur	13

Per personas, funcziuns e mansters vain dovrada per princip la fuorma masculina. Ella as referischa adüna a tuots duos geners.

I. Disposiziuns generalas

Art. 1 Oget

- 1 Quista ledscha regla las remuneraziuns e la bunificaziun da las spaisas per las autoritats, las cumischiuns e'ls funcziunaris dal cumün da Scuol.

Art. 2 Princip

- 1 Ils commembers da las autoritats e las cumischiuns sco eir ils ulteriurs funcziunaris han il dret da survgnir üna remuneraziun chi correspuonda als dovairs ed al temp chi'd es d'impuonder.
- 2 Els sun obliats da dovrar be il temp e chaschunar be ils cuosts chi correspuondan a l'importanza dals singuls affars da lur uffizi.

Art. 3 Bunificaziun da las spaisas

- 1 La bunificaziun da las spaisas (tant inavant chi nu sun part d'üna pauschala) as drizza tenor las disposiziuns chantunalas valablas.

Art. 4 Execuziun

- 1 Per l'execuziun da quista ledscha relascha la suprastanza cumünala ün'ordinaziun chi cuntegna ils imports per las remuneraziuns.

II. Remuneraziuns

Art. 5 Capo cumünal

- 1 Il capo cumünal es impiegà cun ün pensum dad 80 %. Determinanta per la paja es la classa 25 da la tabella chantunala da salaris. La suprastanza cumünala fixa il s-chalin chi dependa da l'età e da l'experienza.

Art. 6 Suprastanza cumünala

- 1 Ingio chi nun es reglà differentamaing, fixa la suprastanza cumünala tuot las remuneraziuns e bunificaziuns per spaisas libramaing aint ils limits finansials circumscrits in quista ledscha. Quels limits finansials s'adattan automaticamaing a l'index naziunal dals predschs da consüm (livel als 31 december 2014 = 98.6 puncts, basa 2010 = 100 puncts). Ils imports vegnan arrondits amunt o aval sün francs inters.
- 2 Ils commembers da la suprastanza cumünala survegnan üna pauschala annuala. Quella cumpiglia tuot las sezzüdas da la suprastanza, cum-prais il temp da preparaziun sco eir las spaisas da viadi e da mangiar. Culla pauschala es remunerada eir la direcziun e l'administraziun dal sector surtut, p. ex. preparar sezzüdas e stübgjar actas sco eir telefonats, conferenzas e visitas ocularas.
- 3 La suprastanza fixa las pauschalas pels singuls sectuors tenor il temp da lavur correspondent. La pauschala annuala vain fixada pels commembers culs sectuors fabrica e scoula tanter 12'000 e 18'000 francs, pels ulteriurs commembers tanter 10'000 e 16'000 francs.
- 4 Il vicecapo survain minch'on ün supplement da funcziun chi vain fixà tanter 500 e 1'500 francs. Scha il capo sto gnir rimplazzà per daplü da 15 dis indavorouda survain il vicecapo o ün oter commember da la suprastanza proporziunalmaint sia remuneraziun.
- 5 Schi dà ün müdamaint d'uffizi o scha ün ufficiant es absaint daplü da 3 mais survain il nouv titular da l'uffizi resp. il substitut proporziunalmaint il fixum resp. üna part adeguata da quel.

- 6 Il cumün paja il fixum in ratas mensilas, davo avair trat giò las solitas contribuziuns dals impiegats.

Art. 7 Cussagl da scoula

- 1 Il president dal cussagl da scoula survain üna pauschala annuala chi vain fixada tanter 10'000 e 16'000 francs. Quella cumpiglia tuot las lavuors chi stan in connex cul uffizi sco eir las spaisas.
- 2 Ils commembers dal cussagl da scoula – cun excepziun dal suprastant cumünal cul sector scoula – vegnan remunerats per las sezzüdas ordinarias, per lur visitas in scoula e per lavuors ordinadas dal president. Els survegnan tanter 40 e 60 francs per ura. Las spaisas vegnan bunifichadas separadamaing.

Art. 8 Cumischiun sindicatoria

- 1 Ils commembers da la cumischiun sindicatoria vegnan remunerats per las sezzüdas ordinarias e per las lavuors in connex culla revisiun dal quint annual. Els survegnan tanter 40 e 60 francs per ura. Las spaisas vegnan bunifichadas separadamaing.
- 2 Il president da la cumischiun sindicatoria survain plünavant ün supplement da funcziun annual chi vain fixà tanter 500 e 1'500 francs.

Art. 9 Ulteriuras cumischiuns

- 1 Ils commembers dad ulteriuras cumischiuns (stablas o temporaras) instituidas da la suprastanza cumünala vegnan remunerats per las sezzüdas ordinarias. Els survegnan tanter 30 e 50 francs per ura. Las spaisas vegnan bunifichadas separadamaing.

Art. 10 Remuneraziun per protocols

- 1 Persunas na impiegadas dal cumün chi protocolleschan sezzüdas etc. survegnan per mincha protocol üna remuneraziun. Quella vain fixada tanter 40 e 70 francs.

Art. 11 Ulteriuras funcziuns

- 1 La suprastanza cumünala po fixar las remuneraziuns per ulteriuras funcziuns.

III. Disposiziuns finalas

Art. 12 Aboliziun dal dret actual

- 1 Subit cha quista ledscha aintra in vigur sun abolidas tuot las disposiziuns dad oters decrets legals chi tilla cuntradischan.

Art. 13 Entrada in vigur

- 1 Quista ledscha aintra in vigur – davo cha la cumünanza d'urna tilla ha approvada – pels 1. schner 2016.

La cumünanza d'urna ha approvà quista ledscha als 29 november 2015.

IN NOM DA LA SUPRASTANZA CUMÜNALA

Il capo:

Il chanzlist:

Christian Fanzun

Andri Florineth